

四庫全書

集部

欽定四庫全書

集部

新安文獻志卷

八十九  
九十九

詳校官中書臣孫銜

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣梁鳴岐

欽定四庫全書

新安文獻志卷八十九

明 程敏政 撰

行實 遺逸

祁門李君與廉墓誌銘

黃潛

君諱與廉字子常姓李氏其先唐宗室廣明之亂避地  
東南至歙之黃墩兄弟三人析為三族居祁門字谿之  
樂田者曰鴻君始祖也十世祖秀有子六人六子而下  
兩世合百有二人後益蕃衍遂為其鄉之望君曾祖諱

俊祖諱聖任父諱如深因所居以為號曰槃隱宋末干戈未定之際里人皆賴以安母熊氏君於兄弟五人中最幼熊氏出也生而秀異既長躬行孝悌侍父疾衣不解帶者三年父沒四年而母亦沒居二親之喪動必以禮俚俗誕妄不經之說悉屏去之葺先廬以奉其長兄而別為諸兄築室乃依山結屋而居焉長兄官池之青陽往省其疾越翌日兄卒其長子甫四歲次未晬奉寡嫂扶護其喪以歸次兄繼卒而兩庶兄亦卒為經紀其

家事曾無彼此之間祖墓世遠多蕪廢率族人訪求而表樹之割己田若干畝立祠於十世祖墓而刻其譜系陷寘壁間族人有子孫貧乏徙他郡而人竊膏其墓地者有夫婦俱死子幼而人竊膏其土田者悉為出力盡復其舊外舅姑沒撫其二子至於成人又皆死為立後而葬焉諸姊來寧而沒者則為治喪而育其子嫁其女從夫遠宦而老且病者則迎歸而為其子納婦俾職奉養夫與子俱亡而無依者生則養之死則葬焉其篤於

倫理類如此君與人交無親疎各盡其情然剛直尚氣  
節臨事果敢歲饑民相率盜取人粟長吏庸孱畏憚託  
故避去君以為稍緩將滋蔓而為亂奮身勇往擒其首  
惡餘黨皆駭散因出所儲以賑其不能自食者人尤以  
是稱之所居有澗水出兩山間架石梁其上以便行者  
暇日則治東園蒔花卉作亭其中而於其外疏泉為池  
構屋其上乃日與賓客以觴詠相娛樂不知老之將至  
也君平生最留意於大學行義之書蓋有志於致君澤

民之事矣慨念兄弟惟已獨存不忍遠去其親暨親終服闋遂無復仕進意將終前一歲語其子曰為人子者孰無雨露之思我旦夕且死其割田二十畝歲取所入給汝祖墓祭自汝祖而上歲時辰省不可廢也越明年春分家祭君沐浴更衣饋薦拜跪如禮祭畢而飲福至三爵即命徹去若有不樂之色坐至夜分左右請少休乃入就寢席未溫而形神已離君生於至元二十九年正月甲寅卒於至正七年二月某甲子享年五十有

六娶吳氏有賢行後君五月卒子男一人曰元孫男  
三人縉綽總女四人以某年某月某日葬于同里石壁  
心田之原君初延致趙先生王先生而與為師友既又  
聞滕先生會朱陸之學而得其同時君年已四十率朋  
從往就講習焉建閣藏書將增廣以為義塾志雖弗遂  
然與君游而接聞其師友之緒論者處則以善其身出  
則能以才自見君未始有德色也君既葬宿昔朋遊之  
士念之不忘於是王君堦以狀來謁銘予衰病之餘久



去筆硯顧念其舉也以義請也以禮不得卒辭銘曰  
李氏在唐國之近屬散處東南為三大族君生盛時不  
行而藏仁興于家善遷于鄉詩書之澤覃及士類是亦  
為政豈必在位不居其功以遺後人孰為可徵石有刻  
文

草庭程先生昂新墓誌銘 曾 策

婺源北七十里有山巉岨其下為三溪里清源程氏之  
族世居之諱昂新字晞說者篤行君子也是為草庭先

生子同守是州到官日淺其風土人物往往未甚知而獨君之名日聞比至其鄉見所謂巖岨之山峯巒嵒聳盤踞數十里是宜有異材秀士出於其間者雖不及識君蓋已知其人矣居無何而君卒其家以君行之足書者乞予銘新安程氏自忠壯公以勲業顯於陳十三世孫湘為唐檢校尚書始遷婺源之三溪里里之程氏皆其裔也君曾祖天益號友于祖中宏號肅軒父時震號南溪君娶張氏二子元端元理君嘗以二程夫子之先

實出新安倡鄉人祠之學宮以風學者所著有隨筆  
藁復藁學藁讀書管見講義二十篇嗚呼若君其  
古所謂鄉先生歿而可祭於社者歟銘曰

生貴達達由命式究其行死貴名名已傳其或未賢行  
既篤賢有譽晞說父何嗟乎不遇峪之陽封若堂吾銘  
其藏視萬古其茫茫

伯會先生汪君會行述

程文

君諱會字伯會姓汪氏徽之婺源苻村里人世業儒徽

在隋唐間為歙州其先有諱華者以才武知歙宣抗睦  
婺饒六州軍事隋亂籍其地與民歸之唐封越國公死  
而為神至今廟食不絕子孫最繁盛居人汪氏十望八  
九始居苻村里者諱集距君十三世矣代有顯人君之  
曾祖諱之和祖諱夢得父諱彥卿連世不仕官而彥卿  
以儒大有名於時學者稱為雨舟先生云君生而穎敏  
讀書一覽即暗記十五六時出與里中少年才子結交  
皆指目異之君亦意氣自許是時國家定江南未久士

夫其業而君家故貧里中又當孔道數經兵火雨舟先生性淡泊雅不事產業至無貲借屋以居又好賓客君百計經營以奉菽水不使其親有一毫不足之憂雨舟先生晚多病客屢及門延話每移日修治藥物具酒饌酬應無虛刻皆自君手或竟夕衣不解帶雨舟先生與夫人鮑氏甚安之亦自慰以為有子也壯嘗買舟與商人出鄱陽過九江望荆湖之墟悵然思親而返遂專意於文學學益肆尤長於詩里之大家爭相延致使子弟

師事焉君亦不屑苟得意樂其人則一就之意不樂非其人即舍去雖厚幣不顧也方科舉之未行也學者以辭章相高君與同里許小山及滕叔野同祖汪又善先生俱擅名當時時人目為四雋及科舉行始欲奮筆以取功名連試連不得志有司乃曰吾志豈不如古人吾命乃不如今人遂潛心經術稍變其舊業而一趨於周程張朱之學不切切於章句亦不汲汲於場屋有自得之趣焉見世儒好著述者病之謂其剝塞穴道反使先

儒正大高明之說鬱而不彰曰周公以後難言禮朱子之前可註書論者以為雖有所激亦名言也君既卜築浯溪之上頗治田園以自娛賦隱居詩九章四方傳誦之家有橫經之堂林木蔚然人號橫經林嘗與許飛許汗九日登牛丘山迥風長嘯人更號其山為三子山其見慕如此集慶南臺所蒞郡學六齋生徒尤盛非才德重碩莫宜為之師君在吳中有以書幣迎君君至坐上齋從容為諸生敷繹經義申規更約以類授業未數月

六齋翕然尊信之御史郡縣長吏里巷老人寓公過客  
莫不稱其善是時君之子幼鳳先以進士貢春官出為  
采石書院山長固迎養君君亦念諸孫欲歸教之遂如  
采石留久之題詩壁間以示志遂歸至正七年某月也  
明年七月八日年六十有九以疾卒於正寢君方疾而  
召醫醫數輩投藥不効既而揮藥去不飲曰年老求活  
何鄙也因正席而卧越六日日正晝或見有白氣如練  
自身騰上須臾卒君個儻夷曠遇人恒疏目簡節而篤



於大義母弟二人李弟弱冠得心疾君盡力視療躬抱扶  
盥沐不懈嘗舟過饒之德興因省某氏姑適姑家疫鄰人  
戒勿入君曰親親之義不可棄也即訪醫求藥以進之信  
宿而返姑家疫尋愈君亦無恙從兄無子而弟有子留淮  
且死屬君曰必以淮姪後我既而利其貲者強起為之後  
君不聽卒迎淮姪歸以成從兄之託外家鮑府君無後君  
求為立後不得歲上其塚墓時節設位以祭之賓客至不  
問家有無傾倒款洽極歡盡禮乃罷與人處嘻嘻善談詭

無町畦或有過面責之不怨人服其平徃徃有鬪爭是非者皆來求君自直解去無所恨其卒也雖疏遠哭之如至親平生為詩文至多輒棄其藁哀諸朋友中得散逸若干卷藏於家君娶同邑戴氏女有淑行先君二十六年卒子男四人皆有才學長伯麟次仲虎次幼鳳次無斁無斁出為舅氏後女二人長適同邑程顛次適俞福壽孫男八人大有少有東有天有舜有我有西有太有女三人以其年月日卜葬于鄉之環珠里環坑源子與君先世故有連君

弟視予予嘗共君讀書許氏之見雲菴是時君之子未學也予入京師數年歸而君魁然為儒先長者諸子有以進士舉者矣予嘗謂君才氣磊落當見大用不恨遲暮而竟委棄如是耶抑將大其後耶君卒之二年諸孤因里人呂君誠舉進士來京師請述君之行將乞銘刻墓上以石且曰諸孤寒微方自念何以得當代名公大賢一言以為先君重有胡默先生者來言一夕夢先君求筆問何筆先君以朱書廷心北筆四字于壁覺而莫曉其故蓋先君嘗遇

今浙東僉憲余公於采石舟中辱與論詩先君未嘗忘先君有知其啟諸孤以是乎問之胡君而信嗚呼生而學不得用於世死而神通於人亦異矣哉乃為叙次梗槩如右以俟立言君子擇焉

洪府君 味卿墓誌銘

程文

歙之南有大族洪氏予所銘者味卿府君之墓府君諱洋字味卿世居王干里其先十八代祖政自睦之遂安徙來至今環里中數百家皆洪氏無他姓府君之父諱

雷轟以擒績溪山民之首為亂者為黃竹慈湖兩鎮巡檢比改官卒祖諱儒當至元初王師討叛將李世達儒以家財具牛酒迎軍昱嶺關主將嘉之辟令歛辭優游以壽終稱長者曾祖諱範宋處士府君生有大志倜儻好學為羣兒豪稍長能飭飲代父巡檢君持家凡調度酬應官府鄉閭出內錢穀之事具有條緒巡檢君賴之隱然為一族之望矣巡檢君卒事母吳夫人益謹歲時節序杯酒堂上率婦子弟姪拜舞為壽莫夜懸簾張燈

笑語欵洽吳夫人歡或至夜分不寐親黨傳相勸美黜  
陰陽家言舉兩世四喪費皆自己出還仲弟復之出為  
伯父後而生產素薄者于家同食與衣約與均財撫李  
弟英寡妻弱子使有所成立聘名師教子斌聞婺源胡  
君默之賢即迎至家躬率子姪師事之胡君者跌宕不  
羈奇士也或夜半燃松明登山聽泉或祁寒著屐臨溪  
上玩雪少不如意輒求去人指以為怪誕府君愈益禮  
敬不敢以主賓故與鈞故胡君樂為之留斌學之成胡

君力也素好賓客東西行過其廬者一以禮意傾之人自以為得所欲常養廐馬數匹以給迎送客至如歸初避宋末兵亂移居覆船山下逮府君始奉親還宅故里鄰大道云年四十又於宅東數百步規園一區決泉開涇手蒔名花美竹槐柳果蔬雜樹其中休則誦詩讀書以詠歌聖賢之道曰用世非吾事也吾將老是焉已天曆元年四月十有五日以疾卒年四十有六府君平生辭氣嚴毅少許可人有是非曲直一處以公鄉閭訟

爭者多詣府君求直其有私為不善者輒相語曰洪公聞之寧無媿乎自府君之沒里中訟爭紛然強暴相陵弱寡不能伸一喙人始嘆曰安得復見洪公以白吾心也府君沒事有所欲為與為而未竟者子斌皆能成其志卒為之娶同邑鄭氏女生男一人斌也女二人長適績溪高若泉次適鄭夫人兄弟之子元秀孫男四人萃生善師萱慶慈壽生以至元二十年正月十六日葬以後至元元年閏十二月十九日墓在里東之慈溪烏山



後十有三年斌以鄭先生玉所為狀來請銘予固辭斌  
回請拜且曰久願有待也予悲其志讀鄭先生狀謂曰  
子之先君子才足以用世局于山林之下無能知而起  
之者得鄭先生而益彰鄭先生狀約而文質而信予不  
能易鄭先生一辭乃綴之以銘銘曰

一石之美遠或致之一木之良小或器之士懷竒抱異  
而世有不及用人有不及知赤兔在野鴛鞭而馳蕭敷  
艾葉委彼蘭芝天者斷可識而入者誠可悲嗚呼百世

之下慈溪之上有式車下馬而過者非府君墓猗我銘  
其碑

處士黃公孝則行狀

趙若惺

公黃氏諱孝則字誠夫號德菴歛之衮繡鄉人十六世  
祖璋自祁門左田徙歛西九里號黃屯曾孫芮唐孝子  
名見史傳後黃巢之亂舉族避兵渡溪北墓側居焉至  
公高祖邦俊曾祖慶長祖淵世有隱德父大受母程氏  
公自幼聰敏器業過人初就塾師大奇之長觀書悉能

通大旨十有七歲父卒兄孝善亦蚤世獨奉母撫其姪  
金聲不幸又喪撫其姪孫泰俾成立俊聲日起由是鄉  
之事無巨細咸推公主維有訟者必先質之公正其曲  
直或相責而退或望廬而返里有父言子不孝者公告  
戒警諭父子感泣慈孝終身宋末李銓為徽州招討使  
公素與善欲辟從仕不起丙子天朝兵至城附銓急遁  
女幼不能負以託公諾之撫訓成嫁之與已女同至元  
庚寅歛潛口松源等處盜賊並起居民駭散公撫諭一

鄉獨安避寇者多依焉監郡瑪蘇庫公總兵來討公醜酒勞軍力言玉石不可俱焚遂留軍中擒其渠魁凌六乙而返餘黨復肆猖獗議進兵屠之公復諫曰殘寇未悛當諭之恩信示之禍福使其來降不降誅之未晚監郡感其言遂給招安旗幟命公單車入其營賊見之以為官軍至搗鼓進兵欲刃之公下車正色自道姓名曰汝元惡伏誅更復何為吾念汝良民不得已而從逆今領將軍命至招汝來歸汝若改過當全汝父母妻子安

業如故汝若不悛官軍復至無噍類矣賊知公名德皆  
羅拜曰更生之賜敢不聽命遂投戈感泣率其黨三千  
二百人各携妻子來降拘其器械數千納之官各鄉之  
避寇而他者皆復田里賴以安全監郡公議以功授巡  
檢使撫降民公笑曰吾豈屑屑為此者辭不受時江淮  
行省委前徽州路總管許楫寧國榷茶使司茂巴爾提  
舉到郡招諭歙境已平上功都省除命未下而公卒元  
貞乙未閏四月二十三日也年六十一男天麟有才德

後公十五年卒孫儒壽觀壽長者署烏程縣校官次從師曾孫塾亦幼慧類能世其家者公嘗營菟裘于所居之西北曰葉干以大德丁未二月奉匱藏焉其右以公之室陳孺人祔孺人進士夢松女儒家也既歸公事舅姑惟謹撫男女有恩待物寬和持身慎約後公十八年以皇慶癸丑正月二十一日即世女名友弟適許鵬南亦儒家子儒壽兄弟將乞銘于世之大手筆以若惺知公為詳俾狀其行自惟涼薄語言不足動人文辭不足

孚衆屢謝不置叙其梗槩以慰稱揚光美之盛心而實  
不足以盡之立言君子更詢里中耆舊則庶幾矣延祐  
五年十月吉日里生趙若惺狀

鮑仲安 元康墓表

鄭玉

仲安諱元康子友鮑景曾之子也予與景曾交時仲安  
方讀書家塾未嘗與人接予又以負薪之役奔走四方  
不遑家居故仲安未予識也仲安勤於讀書自經籍外  
諸子諸史以及山經地志岐黃醫書孫吳兵法與夫佛

氏經典神仙家延年長生之說無不研究而尤以修飭行義為先及予終養優遊林壑以故人子弟來從問學一見即曰前所學者皆誤也吾今而後得聞聖賢之正學矣於是月從事於五經四書而尤盡心於易日讀一卦周而復始玩索有得輒筆記之且曰上下繫辭夫子所以翼易程朱之說嚴謹簡畧蓋引而不發學者宜盡心玩索使與六十四卦三百八十四爻相出入字字有所歸宿方為有得嘗語人曰自吾從先生游於體認



道理識所謂活潑潑者於應事處變得經權之說焉景  
曾晚年仲安尚在幼冲已能出其智謀佐其家政及景  
曾大故仲安既除喪即曰先人勤苦起家蓋欲積有餘  
以及人況聚而能散禮經之善教也元康敢不力迺以  
其歲所入十分為率三分以膳老幼與凡家用三分以供  
公上貢賦及官府百費二分積蓄以待水旱一分賑恤  
族黨姻戚鄉隣自親及疏各有等差又一分貯之別所  
以待親友之有患難者隨其輕重量力周之遣嫁孤女

叔養孤子義之所在知無不為休寧有務官以虧課鬻  
二女陷倡家百計求贖之使復為良設立社倉時其出  
內以濟里社之貧乏弛其息不取又嘗欲置坊局儲善  
藥以救疾病為不樂善者所沮朱文公舊有祭田百畝  
為族人之無藉者所盜賣朝廷既立文公之廟于婺源  
訟之有司數年不得決官民交相詬病景曾嘗語仲安  
曰他日稍有贏餘當以其價予民而歸其田于廟至是  
仲安追思景曾之語鬻其材木之山得錢為中統鈔者

一萬五千餘貫而丈公之祭田始復其他濟人利物之事累數之不能終事母程夫人尤孝謹求新鮮于山澤取珍異于蘇杭時其食飲體其溫清無不得其志焉至正十有二年二月紅巾賊至饒州仲安與鄉人集丁壯結保甲指財出粟以供費用及賊至婺源知官軍皆敗走度民力不可支乃籍鄉里之貧者計口給粟使携老幼入山逃避四月郡城陷賊購予甚急予將死之仲安謀於諸生曰家破可以再營先生死世豈可復得吾將

傾家以解是難乃使其從子深與吾弟璉以計行賂諸賊子始得免九月大軍克復仲安與深璉首起義兵應之出入山谷勞苦成疾病且革譖語惟云殺賊十一月十日卒年四十有四吾邑之人遠者奔赴近者巷哭皆如喪其親戚骨肉焉子使深主喪事是月廿日出仲安之柩于外以待卜葬越三日賊復至家遂燬焉柩獨無恙人以為積善之報仲安天資高卓識見過人自其幼時為學已與流俗不類及從予遊講貫益精踐履益篤

乃率同門為予築師山書院聚學者而肄習焉予方將以講授之事屬之仲安仲安亦將有不得辭者而遽死也豈天喪予乎天喪予乎乃叙其梗槩立表墓上以識予之所深痛云

鄭府君 以文墓銘

王 禕

歛有隱君子曰鄭府君既歿之十有八年其子德裕始奉執友唐君桂芳所為狀以銘來請德裕之言曰先君子德有以成己而壽不及艾也才足以用世而名不及

顯也惟是葬且久而墓上之石猶無文以刻先猷遺範  
將無以暴於後世不肖孤之罪何以辭今幸獲交於執  
事不朽之託竊願有請也予惟自昔君子負其所有生  
不克表著於世死因泯泯而無傳者衆矣今德裕獨能  
圖其親於不朽其可謂孝矣廼閱狀迹其所列與德裕  
言合且唐君其鄉先生也為言尤可徵則為按狀序而  
繫之銘府君諱以文字彥章鄭姓世為徽之歙縣人曾  
祖南鳳宋迪功郎江東提刑司幹辦公事祖申道宣教

郎父昭祖元奉訓大夫江淮等處財賦都總管府副總  
管奉訓公先娶許氏生二子長曰淵承事郎平江等處  
財賦提舉次曰深再娶羅氏宋朝列大夫龍圖閣直學  
士吏部尚書汝楫之六世孫奉直大夫新安通守鼎之  
女生子二人長即府君也府君生而凝重狀貌偉然甫  
七歲氣象如老成人讀書過目即通大義為詩歌語出  
人意表奉訓公愛之甚延名師訓教之常曰此真吾子  
矣不幸奉訓公遽捐館承事君方遊京師縱萬金以結

客久留備宿衛而深又蚤世於是府君獨奉羅夫人理家政內外井井有條遇事應物隨其鉅細緩急處之若絲理櫛比不少素年饑減穀價三之一以賑貧乏鄉黨宗族稱其厚德無間言而產業視舊日益加承事君之家食也治園池構亭榭日與賓客壺觴絲竹以為娛府君左右承順得其驩心而羅夫人春秋高且寢疾久府君奉湯藥惟謹夜則稽顙北辰願減己年以益母壽及居喪哀毀骨立人有所不堪撫承事君之子咸有成立



女各得所歸其孝友純篤有如此府君識度明朗氣和而行夷雅不嗜仕進而樂從賢士大夫游與之游者咸服其德器自謂弗及也至正癸未郡府列其行義上於行中書南行臺楊公衍飭曹公復亨皆名御史也復剡薦之當得官不報壬辰之冬盜及其境以物色求之將強之出府君憂憤疽發於背而卒十二月某日也享年四十有九元配程氏浙東宣慰副使相之女繼室吳氏子男二人長即德裕次德堅女三人適汪誠程輻戴琥

葬以甲辰十二月某日葬在寧泰鄉小干山之原銘曰  
有豐以殖之孰奪而嗇之有振而擇之孰闕而抑之吁  
嗟乎惟命實職之施之獲之子孫其食之我銘以勒之  
過者式之

南雄路儒學正白雲先生唐公

桂芳行狀

鍾亮

先生姓唐氏諱桂芳字仲寔學者稱白雲先生其先始  
祖諱承昉京兆人從宋高宗南渡為新安太守子孫因

家焉曾祖諱廷雋宋登仕郎祖諱虞治周禮以待補出身由婺源嚴田李氏繼登仕後配程氏無子側室有子二人長諱元字長孺號筠軒即先生考也博學工古文名重于時徽州路學教授致仕妣徐氏端重柔淑為閨門楷範先生生於戊申正月三十日甫十歲授業於鄉先達杏庭洪公潛夫之門日記經史穎悟絕人每篝燈夜讀吾伊之聲達旦雖隆寒盛暑疾疢不為之輟教授公愛之甚每夜分以杖叩閣戶曰汝休矣勿過於勞也

年十五侍教授公游吳庠受毛氏詩於錢公水村龔公  
子敬卒業而歸期待之甚至弱冠貢于有司不利客金  
陵聘明道書院司訓再聘司訓于昇庠一時名公碩儒  
若李公青山其二子伯羽仲羽楊公志行丁公仲容李  
公晉仲陶公主敬接識之頃莫不器重之而商確詩文  
咸加推讓後主句容杜叔良家塾監察御史楊公弘正  
以文行薦閩南教職御史曹德昭復催舉遂擢建寧路  
崇安縣教諭始至生徒星散學宇傾圯於是重修孔子

廟庭建齋舍秘書彭公炳元亮為紀其績築杏壇自為  
文以記之時右丞烏克遜公良貞幹卿僑寓崇安深加  
器重開東閣以延之而右丞子煜平章吳公可堂姪琰  
御史王公德美子通御史朝用子巴延不遠千里從游  
講下師道嚴肅諸生雲集翰林待制杜公清碧擅知人  
鑑嘗曰內附以來崇安教官當以唐公清才懿德為第  
一人以滿代去御史安公止善再舉入廣選銓南雄路  
儒學正未赴丁內艱先生居二喪哀戚號泣毀瘠若不

能為生嘗以報親未足買田附祀於西山庵又買田構  
祠於藤源以奉祀事未幾壬辰清亂蘄黃盜起挈家奔  
竄老幼匍匐僅全性命而已丁酉秋我朝龍興平定海  
宇天兵東下而歛之版圖先入職方氏戊戌太祖高皇  
帝駐蹕於歛訪問耆儒而僉院鄧公愈以朱升唐仲實  
名聞召對稱旨有尊酒束帛之賜事載實錄鄧公嘗以  
禮羅之俾掌儒學秋丁祀事牲醴蠲潔禮儀嚴整值三  
獻未終知府魏公均祥飲福受胙而悍卒遽攫其肉以

出先生惡其瀆法盥禮立殿階上朗讀糾劾之文左右  
莫不震懾為先生危而鄧公尤加敬焉退居槐塘上為  
宋故相程公元鳳之鄉授徒家塾買田築室廬以為終  
老計所居之園前列三峯乃扁其居曰三峯精舍提刑  
按察司僉事三洲陳浩記之舊友僉事喜山公行部下  
車延見相與叙話疇昔酒酣先生大噓起舞太守李公  
訥命繪為圖嘗私謚晉陶淵明為酒聖陶先生唐王無  
功為酒賢王先生自稱酒狂唐先生凡歲時令節先生

以圖像祭享設酒漿陳俎豆舉觴浮之不至沉酣不止  
或披衣哭泣歌笑以自放識者以先生有託而逃蓋佯  
狂云門人呂旭持著以傳于時居無何駙馬都尉王公  
克恭太守魏公均祥俾攝紫陽書院山長先是書院在  
南門外燬于兵燹先生謀度地移建于東關縣學旁凡  
士林中勸相木植瓦石構正祠三楹兩廡十楹門屋三  
楹中肖文公傍肖西山勉齋以配享焉宋理宗朝賜紫  
陽書院四大字其二穹碑龜趺墮城濠中雖經兵革甃城



垣而二碑歸然不毀衆以為復興之兆也至是先生興  
勦果驗戊申太守胡公善暨同知何公翔卿禮延於紫  
陽書舍開講壬子千戶唐震朱興卜築於登瀛坊尊以  
師席訓其諸子甲寅夏復築室於烏聊山麓故居舊址  
扁曰文壽堂日以訓子授徒為念雖蒼顏白髮而游心  
經史以自娛樂是年秋七月忽嬰卜子夏左丘明之疾  
然而雄篇巨帙論議英發氣不少衰志不少挫毅然以  
道自任而不以盲疾廢當時士大夫學者翕然宗之

辛亥夏五月患腹疽之症伏枕幾七十日疾已小愈七月廿又一日申時子孫環侍作替曰兩袖清風千里白雲蕭然而逝享年七十有三配江氏先卒三十年有男一人曰文虎以明經舉任四川瀘州江安縣丞秩滿調廣西鬱林州北流縣丞以疾卒于官女二人長順德適鮑添寧次愛德適張仲啓繼室全氏有男四人曰文鳳欽庠司訓以文學舉除江西興國縣知縣改任趙府紀善曰文麟曰文奎以能書徵纂修文淵閣送吏部曰文

楷孫男十有二人家慶江安家煜家興俊民永安保添  
民壽民信民祺民樞保牧民女孫十有一人長慶適汪  
慶師壽慶適潘某月德適程遇懿德適汪宗德淑德適  
汪討得靜德適程繼祖添貴適吳益閨秀適鮑某閨賢  
適吳綿遠曾孫男十有四人桐孫官孫賓孫蕙孫芷孫  
佛蔭茂支希孫佛希茂端茂萱茂美榮孫茂英曾孫女  
十有二人以癸酉十二月廿又六日寔于孝悌鄉呂家  
林癸山丁向以全民祔先生身長六尺二寸美髭髯雙

瞳如點漆面如紅玉氣豪邁老而彌壯雖遭困躓浩如也每當貴客廣會酒未酣清談娓娓議論風生座客傾聽不敢忤視人人畏服而尊敬之其為文一以氣為主辭嚴而理正及其成也神驚鬼愕意態橫出勃勃如春濤起湧令人歎賞其為詩清新流麗出語驚人而聲調格律鏗鏘瀏亮讀之琅然愜聽有武夷縹白雲集畧四十卷藏于家先生生平澹於利慾輕財尚義與人交洞見肺腑不事邊幅而性孝友最隆於教授公敬愛盡禮

先生留金陵崇安凡遇生辰嘉會必刻期而歸致遠方珍果異味以為親獻於諸兄弟怡愉克勤友恭於朋友危苦則賙卹之患難則扶掖之以協於義此先生履歷行事之大槩也予忝與先生之次子藩府交十有七年矣凡於議論之際文字之間得聞先生為詳而文鳳嘗以先生之行述未有能紀之者潛然以請予以僚友之誼不敢固辭文辭蕪陋固不足以發揚盛德之萬一而當世宗公鉅儒顯而述之則有待也遂銓次其言

為事狀一通以俟執筆者采擇焉永樂十二年歲在甲

午春正月望日狀

按戊戌年十二月庚辰上自宣至徽召故老者儒訪以民事有儒士

唐仲實姚璉者來見上問之曰喪亂以來民多失業其心望治甚于饑渴吾深知之仲實對曰自大軍去後民獲所歸矣又問曰鄧愈蔡城百姓怨乎仲實對曰願怨上曰蔡城以衛民何怨之有必愈所為迫促以夫人心即命罷之又問爾能博通今古必諧成敗之迹若漢高祖光武唐太宗宋太祖元世祖此數君者乎一天下其道何如仲實對曰此數君者皆以不嗜殺人故定天下於一主公聖明神武兼數君之長驅除禍亂未嘗妄殺出民膏火措之於社席之上開創之功超於前代然以今日觀之民雖得所歸而未遂生息上曰此言是也我積少而費多所給于民甚非得已然皆為軍需所用未嘗以一毫奉已民之勞苦

恒思所以休息之曷嘗忘也仲實等曰誠如是民之生息可待矣上曰有不便者盍盡言之仲實等拜謝乃賜諸父老布帛撫慰之而去

程先生平傳

汪叡

先生名平字德正徽之績溪人也徽古新安郡程為著姓皆祖梁忠壯公靈洗簪纓不墜至平三十有六世矣先生幼夫怙恃然稟性溫厚恭恕言貌恂恂與物無競鄉里稱之素與里人張德良友善洪武初德良坐鹽價事罹法畧凡百餘人而波及先生御史廉得其情喻之

曰灑於衆則汝免矣先生起謝曰家世業儒非義不敢  
為平不幸為人所誣而又誣人欺天者也天可欺乎寧  
以身待罪御史深歎異之尋謫延安與郡人朱仲杰偕  
行仲杰悍戾不以道相遇盛暑同休憇道旁樹下仲杰  
曰德正守行李我前問店乃趨酒家久不至俄暴雨水  
漂其行囊先生自救不暇仲杰還盛怒責償於先生先  
生如數償之不與校迨至延安仍與同處仲杰以醫自  
託于梅百戶明年仲杰卧疾知不可療以其所有盡寄



之梅曰必吾子至乃可付之既卒梅調守他郡仲杰死  
先生又備棺椁衣衾而舉之或曰其人待子如是獨無  
憾於中耶先生曰彼自虧其德耳且與同郡而生同患  
難而來死無所歸於我乎殯聞者莫不歎服朱氏子德  
生以母命來省覲行至汴聞其久已死而囊篋又為梅  
百戶挈之他往中道還家給其母曰吾買地葬父于城  
東矣又出其所携衣曰此父遺物也越三年庚申先生  
子寔往延安省侍遂命負其遺骨歸績溪信報朱氏子

令迎柩還葬德生怡然不復顧丙寅秋先生自延安歸  
知朱氏柩尚留殯後園不悅曰延安數千里尚為負之  
歸由績溪距休寧僅百里豈可九仞之山而虧一簣之  
功乎且其子既紿其母必慚懼不來即命孫通為送至  
其家其接人待物存心忠厚每如此子寔字以誠亦剛  
直尚義有族弟以忠由河南永寧令轉知潮州程鄉縣  
洪武乙丑以忠之子泰乙年稍弱屈實與偕中途聞以  
忠因事繫獄偕侶求回寔變色責曰汝父官所坐事正

當捐生赴救舍之而歸獨何心乎偕侶曰將如瘴癘何  
復叱曰但當力以赴援瘴癘非所恤也至潮陽月餘乃  
還過文江果以冒瘴而殞年五十有一丁卯冬其子通  
冒風雪往奉柩歸葬通年二十三由邑庠升禮部試入  
監學

論曰先生忠信人也古人有言忠信之人可以學禮孔  
子亦曰必有忠信如丘者焉夫忠信質之美者也由  
之以學焉斯可以為聖賢矣嗚呼急功利尚姦詐亦

云極矣焉得有如平父子者之死不違信義者乎之死不違信義是宜作傳以傳不朽故為程先生傳

程氏國英墓誌

朱升

士之立於世也莫大於報本善其親以及其族里達則施於一世斯可謂報本矣夫天地生我者也秀氣毓於山川慶源於宗祏而禮託於父母斯四者有身之本也父母劬勞不忍言也已我之生也而立也族之人由親而踈邇而遠其愜我謂何妣祖之願於我者猶我之願

於孫曾也存恤所以為不忘也顯揚所以為不辱也  
曾是不顧念雖爵位壓朝著勛名滿天下可以不覲於  
族里可見翁媪於地下哉果無媿於天地生我哉吾是  
以於里人程國英而有感也國英幼不好弄長而知向  
學既冠慕古人為壯遊遊商迤至滕薛城有任中丞某  
者致政里居國英事之數年道德之懿文獻之粹日有  
所得至正四年年踰三十南歸徃役于縣縣宰唐子華  
名士也苦縣事煩弊不理歎曰安得一明快吏集吾事

乎一日觀國英於庭而異之與之語有契執其手以上  
曰吾事濟矣且使佐治詰捕事國英感激道不隱賢凡  
其學之所及而力可為者勉勉焉官若民咸賴之凡胥  
吏恒態官民所病者人不得以幾微疵議之也十二年  
斬黃兵跡郡邑自是四五年間勝復者不一殺傷餘燼  
東奔西避所謂出百死得一生者而能間關委曲於勝  
負之間家之人無失所者里之人卒以保完無罹橫禍  
者風波既定縣之竟內視平時不耗數如此鄉者百不

一二焉故居臨驛道既燬矣乃作新居於水東重屋面山正為屏樹名之方山樓居之右園中有亭曰時止日灌蔬種花竹可憩也亂後有此可謂樂矣弟祐早亡孤遺三人長者亦不滿十歲既成立之皆有家矣兵亂時縣之官有身罹禍而遺無依者二人亦既成立之矣新居且完祀有祠堂客有館矣里人之相處有禮俗供公上有程下至為舟以濟涉皆有常惠矣於是郡縣舉為賢良以病不能行數月竟得終於牖下明年其子宗奉

治命以葬以客陳鑒狀請叙以表其墓焉叙曰徽州休寧縣黎陽鄉懷仁里國英所居也仁其名靜翁其號也東晉新安太守元譚陳開府儀同三司忠壯公靈洗其上世也號南溪翁者其先祖也考諱端而妣之氏沈也壽童者子宗之和嘉善者弟祐之子也張悅吳寧女子子之夫也趙庶者孫女夫也延祐甲寅九月二日其生之時吳元年六月一日歿之時也其配徐氏先年七十卒葬于時止亭右側國英所自營而今合葬焉者也



嗚呼國英有田劣一頃家餘貲不一金僅效小用於邑  
之事而能知以報本為大而力行之立其身善其親及  
其族里所就如此使其稍進於是效一官以展其才用  
得田祿以周不足必大有可觀者而止於是常情慊之  
矣昔鄉先生鄂守羅公作忠壯公廟記首叙夫功名之  
士不可以歸見鄉黨族人者讀之感泣羞愧者十人而  
七八嗚呼若國英持其所就可以見忠壯公於廟廷矣  
而又何慊焉故樂為叙之而復頌之以詩也詩曰

若稽田是蕪蓑貴者身身有本身之本道之存萬與萬  
庇本根程君無官寡貨力鄉閭喪之踰親戚江濱之積  
碣數尺泊舟觀者勸爾德

故城縣丞汪先生

德懋

行狀

趙

鎖

先生諱天應字德懋以字行姓汪氏世居新安唐初越  
國公華保鎮六州賜廟食其長子朗州法曹建二十二  
傳至良佐族益蕃衍自歙下堠遷休寧羅墩距萬安不  
一里許先生七世祖也先生曾祖庚宋太學生元初不

受徵而死妣朱氏祖鼎元浙東茶鹽都轉運司副使妣  
金氏考通饒州路稅司提領妣吳氏先生六歲失怙母  
鞠育之比入小學發憤勵志雖隆冬盛暑未嘗釋卷久  
漸成疾乃闢家塾萬川之上延環谷汪先生而受業焉  
既又從學東山趙先生遍謁諸前輩若待制師山鄭公  
學士風林朱公春坊貞一汪公東阜陳實卿隆阜戴尚  
文俱相師友同里任本初則相視若兄弟然講貫尤密  
於是學問大進經史悉通環谷先生嘉其篤志以清苦

名其齋業益以精其究麟經尤深達其旨嘗以疑問請  
質東山先生凡三十餘條究極性理之說遠近爭聘為  
師先生隨材施教不厭不倦子弟各有成就至正六年  
縣尹唐棣徵各郡名儒局試延前貢省元李廉為主文  
外郡來就試者五百人僅取二十五人先生與焉值疾  
作不果行元末兵興避地松蘿山中至正丙申院判汪  
公同兼保領鎮休寧起義學于商山延先生為訓導居  
數歲聖朝混一洪武辛未春以秀才被召擢故城縣丞

抑強扶弱涖政廉平不苛以察私謁無敢闖其門居歲  
餘為逋租事所累謫居鳳陽遺書戒子云古人處困而  
亨儉德可以避難最是日用飲食要節儉我清苦自名  
故難中易過毋以我言為迂所藏經史子集宜珍藏之  
又寄詩以勉其從師講學雖居顛沛未嘗頃刻忘讀書  
之志三載而終壽五十四訃音之來聞者莫不哀悼生  
元至治二年壬戌正月十三日歿洪武乙卯九月十三  
日葬鳳陽府鍾離縣西南十五里曰西屯娶石嶺吳氏

有賢德事姑孝能口誦孝經諸詩性弘雅人未嘗見其  
出傲言善理家不以勤先生無子立兄恭之次男正宗  
為嗣二女長適邑南程公善次適同里邵彥實孫男二  
長諫次回回以俊秀選為邑庠弟子員惟先生家世儒  
業孝友天至性資嚴毅衣冠整肅平居交接儀容儼然  
親族長幼莫不敬畏幼孤親訓之學底於成而先生事  
親雖流離之時養志不違安人歿於艱危之秋而先生  
喪葬盡禮清修苦節甘於淡泊客至終日危坐談論道

義無倦色雖習舉業而古風近體尤典雅可追古人而  
不苟作環谷先生編春秋纂疏及輯通鑑綱目考異先  
生時與折衷及東山先生之沒尤篤氣誼蒐其平日所  
作詩文編次成帙以傳鎖以先叔東山之故叨陪先生  
几席甚久勉勵訓誘受知惟深茲忘其固陋述先生履  
歷大槩俾來者有考而立言焉時洪武二十二年四月  
望日門生趙鎖狀

徵士程君

吉輔

墓碣銘

薛遠

太常卿兼翰林侍講學士程君以書告遠曰惟先高大父徵士君之葬未有銘先襄毅公欲請於執事未果也敏政不佞嘗撫拾遺行為阡表一通然違世既遠事多漏書近考諸公牘家乘而諗夫失爵之故謫戍之由尚未之白失今不圖則使先德遂將泯焉敢以為請遠與襄毅公同榜進士平生之託豈可孤也乃序而銘之序曰君諱吉輔字昌祐晉新安太守元譚之後也太守十二傳至梁將軍忠壯公靈洗又十四傳至唐御史中丞



都使公澐子孫極盛其居休寧陪郭則自中丞次子南  
節公始南節五世生宋開州團練使全死節于金子先  
孫永竒並受學朱子永竒五世生榮秀君曾祖也元江  
浙儒學提舉妣劉氏彭城縣君祖文貴饒州路德興縣  
銅冶場提領妣鄭氏考社用薦為承奉班都知不赴妣  
吳氏生二子長即君次國勝事太祖高皇帝為帳前管  
軍上萬戶死節偽漢追封安定伯加贈開國輔運推誠  
宣力武臣榮祿大夫柱國安定侯謚忠愍廟食康郎山

君生而端慤氣宇不凡美鬚髯長及半體見者以為異人從學陳實卿趙子常二先生涉獵諸經史尤好兵律星筮之學要必為有用至正末紅巾盜起婺源人汪同起義保州里忠慤侯發兵應之君悉力持家以佐軍需會天兵下徽州衛國公鄧愈得君兄弟竒之送京師入見君固辭乃留忠慤侯置帳下而釋君還洪武庚戌詔江南諸郡縣大家一人赴闕君與行上親御奉天門賜宣諭將留官之君復辭歸丁巳求諸功臣後而忠慤侯

無子有司以君應詔時汪公廣洋為丞相汪公之先居  
休寧旌城忠愍侯夫人其從妹也君因客其家汪公為  
言于上將俾嗣爵而難作君亦被繫獲免凡汪公建白  
一切報罷君既歸益韜晦郡邑累徵辟皆不就壬子黃  
公希范出守徽郡與休寧令有舊好令數遣君遺書黃  
公黃公雅重君每事咨訪或屏人與語至夜分乃罷是  
歲太宗文皇帝入靖內難黃公被罪休寧人有憾于令  
者奏其事詔俱逮之君之子杜壽亦上言某嘗以書算

在官與黃公致書者某也。老父實不知由是令生重辟而杜壽發從戎河間。君居家嚴而有法，尤篤於行義。周貧卹匱，至傾囊弗吝。晚歲家益落，去隱邑之葆真山，不復問世事。日與道流者居，怡然自適。初伊川先生子孫從南渡居池州，一還居休寧，與陪郭程氏互相擇繼。君雖出南節，實伊川之裔也。永樂戊子十一月十二日終。于家享年七十有九。距生元至順庚午十二月十五日。配吳氏，同里人。克相君子，嫺鄙稱之。卒年八十有五。合

葬縣東北三里水橋子子男三人長即杜壽累贈兵部  
尚書兼大理寺卿次元泰福建尤溪典史次道宗孫男  
五人長晟初贈吏科左給事中累贈官如其父次斌次  
昱次宣次旭曾孫男八人長信正統壬戌進士歷官中  
外為時名臣贈太子少保謚襄毅次佑瀋陽中屯衛指  
揮僉事次倫次儉次偉次俊次傑次佺玄孫男十九人  
長敏政成化丙戌進士及第歷今官正學高文時論攸  
屬次敏德詹事府主簿改判蘄州卒次敏行敏功敏文

敏通敏事敏聰敏時敏恕敏膺敏芳敏亨敏哲敏庸敏  
宏敏才敏堅敏導五世孫男八人長垣早世次璵錦衣  
衛百戶次圻次塏次鑿次璫次堂次埏銘曰

嗚呼蒼天報施善人不在其身必在子孫卓彼程君趾  
美韜真勲猷未建而發祥于曾玄者甚偉爵秩未加而  
延慶于武衛者方殷惟前之屈惟後之伸是宜執筆大  
書為來者勸而永其聞乎

孝則居士程君

可紹墓表

趙沔

君姓程氏諱可紹字致和徽之婺源人也其先世居邑之鳳嶺至君之高祖宋待補上舍子敬遷高安鎮西居焉曾大父仲賢大父震昌父子英皆鄉義士而君承先世詩書之澤幼從伯父林隱公復心與雲峯胡先生學修身謹行克自樹立鄉有不給者周之有急難赴救之里有稅場官每事咨君得無敗事他如葺橋舫以濟涉施湯茗以惠賜者一鄉德之中年由高安鎮西徙居中市溪北築亭水濱曰觀瀾為延師教子之所危學士太

樸為書二大字揭之楣間至正戊子汪尚書叔志胡山  
長世佐朱進士公遷皆詠識之居之左起屋立龕奉先  
世神主取大雅詩語題曰孝則堂丹陽尹黃公子厚為  
之記刻朱子孝經刊誤以勵後學鄉先生仲魯汪公伯  
武王公為之序而林隱公與之編輯世譜勘訂經傳惟  
日不足歲壬辰紅巾盜起時下令民有擒賊首從者予  
爵有差趨令要爵者比比然君曰人生富貴各有命以  
人命而易功名亦奚安哉鄉之蜂屯蟻集者君以正道



化之多屏息癸巳冬母孺人以壽終君居喪盡禮一門  
四世雍睦如初是歲旱遍野憂惶君齋禱于禾嘉潭龍  
湫而雨甲午又旱君發所積以賑不足則散所儲帑帛  
問糴他郡人以是益賢之丙申挈家避亂衢饒之境邑  
之豪士首辟君辭不赴語使者曰人生百年遭此厄偷  
生為幸何意功名乎再避難德興之文港蘆坑臨終語  
諸子曰風塵瀕洞至此極矣謹身保族若等勉之言畢  
而逝君生元貞丙申三月二十一日没至正丙申十一

月十一日享年六十有一娶同邑中山隱者祝公壽朋  
女諱隆性慈惠篤孝敬閨門肅然一宗慕之生大德丁  
酉四月十二日沒至正乙未十月二十五日子男二禮  
用達道女四柔德適潘潤德適呂意誠適張意德適李  
君墓在里之南岸之原噫君昔與予遊師山鄭先生之  
門情好深厚其婿貴武呂公西岷李公復以武備咸集  
雄峯翼繼又以文事會徽府而禮用達道明敏博達信  
君之德為有後也一日達道過予東山精舍奉君行狀

再拜曰先人捐世今已五年生不能致孝養歿不能發  
幽光為罪大矣先生於先人知之為深願賜以文予既  
悲君之未遇而又重其子之請也敬叙其梗槩如此庚  
子歲七月既望書

新安文獻志卷八十九

欽定四庫全書

新安文獻志卷九十

明程敏政撰

行實遺逸

高安處士程公

達道

行狀

祝彥暉

公姓程氏諱達道字彥達中易敬之世居徽之婺源由鳳嶺遷高安曾祖震昌祖子英父致和人稱孝則居士公性資謹厚尤篤孝義識趣高邁議論不凡伯祖復心先生愛之教以四書大旨嘗侍外祖舅顯夫說春秋從

貢士胡先生仲彝學於松蘿又侍其族叔均度於高安  
溪上之觀瀾亭為學不倦所造益深事親行已待人接  
物一循於禮而有權度人敬憚之州縣儒學累興科舉  
即占名前列秋闈貢舉累試不利值世變侍親避亂山  
中父兄俱喪煢然獨立時天戈始至訪求高士公乃出  
奉命下德興招徠其邑之大家如李西岷王必先祝汝  
明葉貴明後皆顯宦於朝是時巨室多以豐財殖身惟  
公獨以恬退謹畏自守保其孤弱人莫能欺皆為學之

效也有識者稱為獨醒翁先是軍籍多不役民以田糧  
私入軍籍官中徵斂毛起民役愈煩往往顛躓衆不便  
將言之莫敢為首公身任之有司以聞獲免役遂均民  
方蘇息洪武八年秋郡縣以朱子廟宅傾頽檄公往佐  
之役公夙夜躬勤出已帑以給羣工不日告成程氏始遷  
婺源祖自唐檢校尚書湘公而下墓若干所公每春暮  
率族屬汛掃鑿石以示永久又與從子邦寧往歆拜始  
遷新安祖晉太守元譚公墓時民以太守之墓地為園

公率歛宗人仲寧任徵贖復之求立石於墓前以志中  
歲築室南村有水石林壑之美號南村老人時樵墅韓  
公貞一汪公孝友葉公嬾菴王公東山趙公皆一時老  
師宿儒公皆與之相遊處久之復還故址之南溪湖上  
更號己矣軒遵父命於居左卣孝則堂以奉先世神主  
神主之陰公各為之贊臨溪起樓三間曰亦政刊朱子  
所書敬齋箴宋司馬公所書家人卦于壁積圖書先賢  
墨蹟於其上暇日編歷年紀實及程氏孝則堂家教輯



錄一卷曰養子須教讀書曰嫁女先要擇婿曰娶婦必  
論家世曰田園貴能守成曰持家務得其人曰生財務  
得其道曰丘墓必以時省曰祭祀必以時修曰待宗親  
要當以禮而不失其親處鄉黨要當以和而不失其正  
責己必嚴謹責人放寬恕曰好師友必須親尚庶有講  
明見財利不可貪嗜防其陷已列為十目各為一章論  
之年五十即自營塚壙而誌其墓又自贊其像與神主  
之陰其言皆述全歸之理達死生之義類古之有道者

公生元泰定三年丙寅八月九日終大明洪武十有四年  
辛酉九月九日壽五十有六配同鄉環珠里中山祝氏文  
學德夫之長女諱賢生至順元年庚午六月八日終洪  
武六年癸丑八月十五日壽四十有四孝和恭惠先君  
與吾母遇之最厚兵燹後與伯姆孫皆以不及事公姑  
為大恨春秋克相祭祀事夫盡婦道鄉黨間競以取法  
其德性行實有不能備述者繼室湖南白氏側室同里  
黃氏子男邦直女深適德興文港季子同汪適中平江

永春汶適文港李文岳祝氏出也沂洛黃氏出也洛適  
中山祝有常源白氏出也公葬里之南岸朱紫塢亥山  
巽向公之行實多見諸儒文辭宜不可贅第以邦直乃  
彥暉姊氏之子而彥暉又與公為內外兄弟敢述其大  
槩以慰其子之請俾乞銘于當世之大手筆而誌其履  
行焉洪武丙寅八月望日中山祝彥暉謹狀

汪氏孝友二士

耆英漢英

傳

陳

鑿

汪耆英漢英耆休寧安樂鄉人也當元至正壬辰紅巾

兵起蘄黃亂江東剽掠村落者英與弟謀曰吾兄弟不  
幸生遭世變而年壯力强盍相與倡義保障一里以安  
吾親漢英然其言於是率勇敢士以拒敵者數矣一日  
倉卒寇至者英與角力不勝墜于陷穿大呼弟曰吾弗  
濟矣汝亟脫身以奉親漢英聞之奮勇死戰賊方散去  
遂援兄起俱全於難者英謂弟曰今居常衝要兵燹無  
寧日萬一陷白刃誰奉親終乎不若隱遯以濟艱難遂  
相與奉親挈家累寓親故間關數年迨我高皇帝一天

下再遷今之和睦鄉充山居焉爰棄武事耕讀為業養親以安或勸之曰以子之能當為國家用乃自屈為鄉人乎君曰遭亂世而能保其身以全其親得為太平之民足矣又安敢求榮哉知者以為遺安計也優游晚景壽考而終鄉人號曰孝友二士其子觀勝恐久而事泯求傳於予予惟百行莫先孝友書云孝乎惟孝友于兄弟自世亂道喪骨肉相殘求如二君者幾何人哉噫當墜身之際微漢英不能脫虎狼之厄微耆英之謀豈能

全父子兄弟之恩恩義兼至可與古人孝友媲美矣抑  
子聞君之遠祖越國公當隋之亂保障六州廟食百世  
大有功德於民君之立心行事不媿越公後世必有顯  
融故書之以勵夫世之德鉏耰紆臂者贊曰

元季亂離人民奔馳君獨倡義欲濟艱危力不能支墜  
于坑塹弟感兄言奮死一戰寇兵潰散我身得全相與  
謀議奉親東遷于孝于友死而不朽不顯其身必昌厥  
後

孝廉程公

孟思

墓誌銘

俞韶美

程公孟思歿而葬且幾年嗣子敬夫自為狀來告曰先君子智足立事不輕於有歆才足適用不屑於有為修身慎行獲保首領以歿三子惟仲方長懼無以昭先德敢請誌諸墓以示方來按狀公諱賓賜字孟思姓程氏徽之休寧人先世自休父為周宣王司馬雲仍駢蕃隱顯不一至東晉有元譚者為新安守卒官因家于茲十二世曰忠壯公靈洗梁陳間以拒侯景保障黥歛黃墩

至十一世孫迪宋休寧簿有善政子照卜居山斗照九世孫安節宋季為京西招撫司義士軍副將兼統領生掌書峒即公五世祖也高祖華仕元為帥判曾祖仁祖相卿生三子叔賢叔志叔祥叔志即公父也配陳氏公生嚴毅有志畧元季盜起舉家避地劍潭洪武甲寅還故居公甫十三即能率丁夫於池州斫海船木起赴郡咸譽其立事之早未幾朝議以戍戌自實田或未實改造洪簽公言於衆曰朝廷慮豪戶詭寄靠貧弱吾輩



豈可復踵前弊以蹈不測哉一秉至公毫髮不少假至  
今賴之石灰山之役公與兄子初偕往灰折多謫浦子  
口種苜蓿繼奉恩旨凡後工役者許西河納米五十石  
贖罪公蠲已帑以倡諸父昆弟不期月初亦獲釋嘗自  
婺源伐巨木五千餘由饒湖抵京至安慶和賣之令下  
亟以狀聞請輸官太祖高皇帝嘉之命光祿賜膳又命  
內府給價酬其直公神清聲長面方耳聳事父母以孝  
聞叔志素嗜閒弗任家事一姊與弟孟達既長獨力為

之聘娶邑令周德成舉公孝廉弗果行鄉人遂稱之曰  
程孝廉云公於天文地理陰陽卜筮詩書六藝無不涉  
獵尤長於醫然剛直太過易與物忤每遇貧弱有橫罹  
強暴者身當之見雅德君子則和氣盎然如陽春然晚  
建觀稼步雲二樓督子孫耕讀又擇山斗佳勝處為八景  
播之聲詩以自適公生元至正丁亥歿永樂甲申享年  
五十有八配古林黃氏先公十五年卒葬本里金家山  
男三人長仲方即敬夫次季方禮方繼室西鄉畢氏後

公數月亦卒孫男八人曰維崧維岳維崙維岷維嶽維  
嶷維巒維蓉孫女三人先是公族兄伯叙嘗謀葬於泰  
塘穴未啟也公歿敬夫請焉伯叙慨然曰昔二豎交攻  
蒙而父更生之德久未獲報今乃若爾即同穴而葬庸  
何傷命工鑿石為一穴而葬其左銘曰

程氏著姓肇自休父總統六師克播皇武迨至元譚官  
于新安繼以忠壯功業桓桓盛德之後必有餘慶公之  
生也幼而脫穎器宇軒豁志氣超羣才邁於用德潤其

身外隆師友內睦親族孜孜於善惟日不足技藝畢給  
尤長於醫弘濟天閔躋諸耆頤泰塘之原佳城鬱鬱宜

爾後來子孫蟄蟄

山斗八景圖記新安大好山水而休寧視諸邑為勝由邑而南羣山如龍

清溪如練翻者以翔麟者以泳晴嵐翠靄晚夕百變而  
尤勝者莫山斗若也山斗負山帶河為一關之壯東則  
雞龍之山天井在焉南則芙蓉諸峯突出獻秀其西與  
北則燕溪清溪二流滙為劍潭由浙江而東注于海此  
其大都也然土沃而饒利民質而好學程孟思氏世居  
之好事者即其所居之勝目為八景曰劍潭浸月曰玉  
石生煙曰清溪柳色曰黃浦荷香曰方塘水活曰疊嶂  
雲間曰燕谷樵歌曰龍華鐘韻又從而詠歌之蓋將有  
取于考槃之詩也壬辰後居室燬于兵者大半而存者  
無幾鋒鏑縱橫畧無寧歲其父老莫不相攜去之越五

年國家大兵東指羣盜駭散洪武以來號為至治其散而歸者亦既辟除榛荒而修其垣牆易其田疇為之播植愆遷有道而富庶又幾于昔矣於戲運有興廢而人物由之而盛衰獨溪山之流峙者不相與同一變滅是則所謂八景者可無重紀乎孟思與其族人之聚於斯者讀書足以繼先志治生足以奉公上所謂居吠畝之中樂堯舜之道者八景蓋有助焉宜流于永久而子孫是式也洪武乙亥冬十一月廿一日歙縣知縣李夢鵬書

吳處士達墓誌銘

曾榮

吳處士既歿三十餘年其子同謁於予泣而請曰先人力為善而不獲施之當時顯於天下今墓木拱矣而

石未有文恐終無見於後世孤之罪也幸為之銘予哀其志辭不可遂撰次而銘之按狀處士諱遠字希道桂林其自號也上世繇姑蘇來居休寧五季間有諱皓者復徙邑之璜源詩書相承代有顯者高祖申宋江淞漕試授登仕郎曾祖鉢祖應紫領鄉薦補太學上舍生父君儀元饒州路醫學教授母汪氏旌城望族處士以至治壬戌十月二十七日生幼穎敏好讀書不啻飢渴之於飲食弱冠授徒於鄉屹如老成人乃侍父宦游元都

博學洽聞公卿貴人皆器重之里俗或乘喪嫁娶恬然安之不為異處士遭父喪聘而未娶宗族親戚皆強之處士厲聲色以拒繼有來言者輒撫膺號慟欲絕強者慙而止苦塊居廬幾至毀滅元季兵起羣盜蠭起處士周旋其間孫言危行未嘗為不義屈盜亦無敢侮之者鄉民胡仲德聚眾攻剽執里士黃伯宇金萬全吳善夫吳伯原將殺之處士馳赴謂仲德曰是善人也殺之不祥仲德即解其縛縱之後數人者望見處士輒舉手加

額曰生我者父母也再生我者吳公也處士既沒皆為服喪三年處士嘗與弟希榮同隸戎伍既而轉戍永新而希榮留家田去籍為民處士獨任其役無一語怨懟竟以長子代歸晚際天朝海宇寧謚而家道小替處士布衣蔬食居常欣欣然無不足之色平生謙退周詳動止有常度所過無後言所居無惡聲雖宴閒獨處必正襟肅容凝然靜坐見子弟必具衣冠室廬狹隘必灑掃蠲潔鄉黨有孤嫠者必竭力周之惟恐後貧不能葬者



必資助之母年八十嘗感風疾數年處士治湯藥視矢  
溲雖甚勞憊終不委之家人洪武戊午五月二十八日  
終得年五十有七配汪溪金氏有賢行鄉閭稱之男四  
人惟諲壽同惟壽皆先卒孫男五人德符篋驥德徵德  
懋以庚申七月二十日葬里汪旨坑之原處士好為詩  
春容幽遠渾然不見雕琢所著有桂林集都是春集若  
千卷藏於家同字和中永樂初以善書選入內廷有文  
學克世其業銘曰

吳氏之先粵錄仲雍世家姑蘇克振厥宗分居休寧爰  
自五季皓遷璜源有衍無替暨于處士炳蔚其文蓄而  
不施厥聲以聞孰畀其材而嗇其壽畀將疇司嗇又奚  
咎所得則少其存孔多天實為之人其謂何蒼山峩峩  
墓道有石後有考者請視斯刻

金處士 祖壽 墓表

江秉心

休寧南街之金公孟起卒卒之夕閭巷之人奔走而告  
哀者相屬於道邑為之罷市鄉之耆老宗親姻黨莫不

咨嗟涕洟以為德人亡矣遠近是非孰與之辨顛連孰與之恤強梗孰與之厭服其心吾黨將何所倚賴乎殯之日相率聚祭者五百餘人縣大夫泮庠與搢紳諸生與夫黃冠緇流肩摩踵接莫不追送於南門外百里之內三農士庶奔馳執紼而效虞殯之歌者又千餘人嗚呼孟起何修而能使人悲歌思慕於既沒之日若是是宜伐石而書之以告其後之人焉按公諱祖壽孟起其字也姓金氏其先出漢栳侯弟侍中倫家世相傳遠有

端緒曾大父道父大父伯高者仲善皆隱德不仕孟起  
為人胷次明白不設機穿個儻好義與其弟孟賓同心  
克家歲時節朔拜奠其先世丘墓極孝敬見饑者與之  
粟寒者與之衣顛連困苦與錢久則焚其券鄉間有  
訟紐結而不能解者縣大夫則命孟起孟起當稠人聚  
訟間曰某也直某也枉某也許衆莫不怙怙畏服陸梁  
遇諸途亦加欵戢而加敬焉縉紳與冠蓋之士至其家  
則倒屣迎之無日不推羊醜酒自遠而至者為經月留

賓忘歸而主無厭也邑之寺觀庵宇有廢弛者孟起亦  
倡而修葺之永樂間邑令陳綬守已廉慎因他事負累  
發山東驛遞孟起遣人賫白金徃助其困宣德初舉行  
鈔法監察御史何公文淵至下令通于一邑孟起跪而  
進曰楮幣滲不行自古有之休寧之民商少農衆願出  
已鈔十萬貫以蘇一邑之人公納之衆莫不歌舞其德  
孟起風神灑落善談論貴義輕財皆此類娶程氏生宗  
道先卒繼呂氏同邑建昌令公大之女生宗敬孫男六

人溫潤岩俊岩相岩英岩秀孫女五人孟起生前甲辰  
二月三日終於宣德戊申其卒之日日同其始生之辰  
享年六十有五葬於邑西五里葛川之原予嘗聞其邑  
之人曰仲善當國初歸附時隸王駙馬幕下掾元季徽  
之民占籍為兵者千餘家駙馬公得其籍欲沒入為軍  
仲善委曲勸諫乃將其籍而焚之終身不以告人及生  
孟起名聞朝著說者謂仲善陰德之報蘇文忠公有云  
善惡之報至其子孫而後定豈不信然嗚呼孟起沒矣

邑士吳君以聲為著其狀翰林侍講學士曾公鶴齡為  
銘諸幽正統庚申秋子寓錢塘日又得其遺事於其鄉  
之父老其子宗敬復拜泣求予文表諸墓春秋之義發  
幽闡微予故竊取其義列其生平行事之實於石揭之  
墓道且以慰其鄉黨宗族之思云

徵士程公

杜壽

墓誌銘

王直

公諱杜壽字子齡姓程氏世為徽之休寧巨族其先世  
詳見朱學士所書公叔祖安定忠愍侯國勝之碑公之

高祖榮秀任元為奉直大夫江浙等處儒學提舉妣劉氏封彭城縣君曾祖父貴宣義郎饒州路德興縣銅冶場提領妣鄭氏祖社至正末用薦為承奉班都知不赴妣吳氏考吉輔國初耆宿也妣吳氏初耆宿君禱于唐宰相杜黃裳之廟而生公故因以名公生秀穎異常耆宿鍾愛之遣從鄉先生游博習經史下及醫卜地理法律之學又從故詹中書希原學書洪武中有司薦上京師公懇以疾辭歸專以耕讀為事每日古無不耕之儒



亦無不學之農縣大夫將聘為塾師而民與縣大夫交  
惡者上言及公詔俱逮至京謫役臨濠又北戍沁州轉  
徙衛輝所至登臨懷古畧不以夷險介意識者壯之未  
幾南戍桂林未行改藩陽中屯時河北亂後蕩無居人  
衛使率所部闢草萊躬官府畫屯戍而主者武人一藉  
公贊之公考驗地志酬答公移上下遠邇犁然有緒中  
屯寓治河間自永樂宣德以來歷姜濤許侃廖謨三守

皆賢而慎許可每撰造公竟日所語皆先賢格言故事

欽定四庫全書

新安文獻志  
卷九十

十五

未嘗及私也公既植家河間而親闡祖域遠在江南歲時南望再拜揮涕已而父母相繼卒公匍匐走數千里奉襄事挈其幼弟原泰與俱北教養之原泰遂以布衣從尚書黃公下交趾授縣官公見諸孫信有遠大器資遣為學生躬督勵之曰先世多名德而中危於吾所望以復振者在汝汝可不自力乎信果舉進士通朝籍公晚歲益端居自適方見其孫受祿養而長子沒公哭之哀遂以正統丙寅六月五日病卒享年七十有五時信

方以父憂家居含遂贈歛悉依治命如禮配汪氏同邑  
名族女有賢行子男二長晟次昱俱先公卒孫男五長  
信今吏科給事中次佑次倫次儉次偉孫女五長適儒  
學生白瓚次適儒學生王哲餘在室曾孫男一曰敏政  
予聞之廖太守云公平居敦孝友教子弟嚴而有法與  
人必以善道不媿媻手所筆錄動成卷帙細書楷畫雖  
老猶謹殆類乎古之篤行者其言蓋不誣也信將奉公

葬河間城東金沙嶺之原以虜所為形計子鉉鉉

欽定四庫全書

新安文獻志  
卷九十

十五

有歆程宗世德允隆猗嗟徵士孰關其達不耀自躬有

孫奮庸我作銘詩式昭其終

朱處士復得墓碣銘

楊寧

永樂九年辛卯夏五月六日歆處士朱希生以疾卒于

金陵寓所弟希同奉柩歸以是年十二月二日葬虎兒

丘之原今四十有二年矣其孤惠奉書并郡人吳以聲

所述事狀遣其子長宗走京師詣予書畧曰先人墓未

有銘恐遂沉泯敢請刻辭用光泉壤而名永長存予先

尚書教授徽庠時與希生文字友惠又予所知者今遣  
子數千里來予雖蕪陋銘慙可辭耶按狀處士諱復得  
希生字也上世居休寧之月潭後徙歙南之杏城因家  
焉曾大父景太父元凱父貞佑俱隱德弗仕母洪氏  
處士穎敏明達博涉羣書有大志尤篤於孝友年十四  
遭父喪時伯兄希潛先卒仲兄希仁客閩中而希同尚  
在髫髻獨處士以幼年當大事衣衾棺槨盡禮哀麻哭  
踊中度雖老成人不之過也以未有葬所日徒跣從術

人董得章者求之卒得吉地沙丘之陽葬焉復作堂墓  
南以時省祭其間又明年仲兄死閩中處士時年十六  
匍匐數千里歸其喪人以為難母孺人在堂奉養無不  
至務得其惟心事二嫂恭謹未嘗少違其志母沒喪葬  
一循禮制因作二嫂壽藏母側後二嫂皆守節以終亦  
處士事之以道也撫希同底成立友愛純至處鄉里盡  
恩意濟人之急恤人之患為之惟恐後里有程仲芳程  
勝三者舉家疫人莫敢近處士獨日至其家藥之飲食

之二家賴以全活他事多類此嘗慮宗族日就踈遠子孫易忽忘乃更考定家譜支分派別有條不紊先尚書為之序後處士以子姓日滋改作所居雖朴不為華而規模宏廣居旁構一小亭俯瞰溪流樹之花竹日與高人文士吟觴其間名曰止足取諸知足知止意也處士為人慷慨好義輕財利尤樂交文儒談古道人有善稱之不絕口有不善雖貴要直言不避蓋磊磊落落士也生於洪武甲寅十一月十四日享年三十八配同邑張

氏有賢德子男五長即惠讀書操行有士君子風次懋  
嘏良貴皆克家女二人長適方公海次適汪孟洪孫男  
十三人長宗慎宗裕宗儼宗敏宗和宗富宗開宗嵩宗  
留宗玄護道宗偉宗惟處士年不配德而子蕃昌足以  
見積善之報為之銘曰

錫爾賢宜永爾年嗚呼處士而胡不然積善在躬餘慶  
自天視此後人瓜瓞綿綿

簡直汪先生

文亮

墓表

胡謚



婺源汪簡直先生既卒且葬餘八十年于今其曾孫福  
建按察副使進懼其潛德久而就湮也躬具事狀徵予  
文以表墓子曩與副使聯官山西嘗預聞副使詢得治  
民言國初廷遣茂才官汪某者以給贖獄泣焉有聲  
焯未泯蓋識其為曾祖覆詰弗已屬予修山西通志將  
摭列宦蹟副使尋遭艱去罔獲履歷顛末未果載今徵  
狀不誣他行業尤夥是宜汲汲圖暴諸而以屬予其容  
以不斐辭按狀先生諱文亮字用晦一字士晦姓汪氏

初號困學以自勵晚更號簡直志平生也人因稱簡直  
先生其先系出唐越國公諱華十三傳至兵馬使諱道  
安鎮婺源兵馬子團練討擊使諱濟分戍婺之三吳鎮  
皆有保障捍禦功團練子諱中元卜居鎮之上流鱗溪大  
畝自是世為婺源人又七世宋行省左司郎中諱廷植  
其配李郎中生竹友諱琮其配俞竹友生見山諱德慶  
其配江是為先生曾大父母大父母父母也始見山翁  
祈嗣於下田源夜夢神人指盎盛水族具鱗甲者三顧

謂曰斯若嗣也後果生三子伯曰士傑仲則先生季曰  
士展並有學行先生尤穎出元季兵擾舉族避地浙西  
先生甫髫跋歷艱險所至之處皆識之不忘國朝始寧  
復故里見山以仲兄海樵諱仲恭乏嗣以先生後之其  
於二天事之舉無違禮海樵歿其配俞挈其背裝媵從  
依居外氏先生數迎養弗允虞外氏必因利厥有也書  
籍數讓與之力請俞歸養愛敬兼至終其身不衰先生  
善幹蠱故居撤而新之拓生業倍徙舊遺遂以資雄于鄉

豪猾倡賦閩縣無科山動以數十萬緡計先生集衆議不便亟論諸官得已故歛市民構營舍材多腐縣官欲令鄉民代易之亦力勸止焉洪武歲丙子有司以茂才舉先生應詔朝廷試中官之未授秩銜是年命監造旗手衛工役明年命錄應天府獄冤抑多所平反老穉株連者悉具以聞會大赦獲免凡數百人既又命往山西賚將卒一視所立邊功為差錄所部獄如在應天不寬一人故其民稱之至今有以哉尋命四川清醴課征蠲

惟當還朝俄自引年遂得謝永樂改元乙酉有司復舉先生應徵賢之詔詣朝屢與一二大臣論時政皆合大臣有薦先生為同列先生力辭復請老歸時鄉有虎害先生為禱於神以息凡遇旱潦疫疹無不禱禱則應平居樂施與藥病樞死食饑衣寒無少靳貸者未嘗取息負則不責其償尤嚴回正之辨汲引善類殊惓惓焉里人有爭求折片言各怙服去每疾堪輿家壞祖墓風水因悉究朱蔡諸家言相得吉壤葬其大父母及考妣凡

三墓復中元及高祖七萬二祖墓若地之見侵於人者  
歲時戒族人各封樹其先塋惟謹有無藉子夙銜先生  
乘釁反噬連繫金陵其子潯濡力訴之事幾白先生以  
疾不起永樂辛卯正月二日也距所生元至正甲申閏  
二月一日享年六十有八初娶于江生二子潼澧繼娶  
于胡生四子潯濡沚漆側室潘生一子瀨女一適江祐  
年孫男二十一人曰棻者封刑部山西司主事曾孫六  
十人曰進者即副使也玄孫一百十五人曰儼者德興

教諭曰璽者武昌知縣曰嵩者睢州同知葬以宣德辛  
亥十二月二日墓在武口鎮背兵馬使兆次先生所預  
營也嗟夫有陰德者後必昌先生筮仕未顯其所庇休  
于民乃克紹先世垂裕後昆且乘復始之機汪氏將來  
盛大其可量也邪故為最先生凡行文諸石以詔其後  
人俾知所自云

處士蘇公丑行狀

蘇大

公諱丑字叔武先世居開封宋參知政事易簡之後易

簡長子壽知歙州遂居休寧十二世生聖公之曾祖也  
聖生恪恪生泰公之考也皆有隱德母孺人吳氏以元  
至正辛丑六月二十九日生公因以歲名焉公生六閱  
月而孺人卒泰贅于陳村陳伯仁氏伯仁者邑老儒自  
新先生之兄也未幾泰亦卒陳孺人辛勤撫育一如己  
子公端重謹審自小如成人自新先生因收教之長益  
克自樹立因經喪亂有亢宗之志乃自陳村還居邑中  
依其從叔伯遠翁翁器愛之教以貨殖家日豐裕再遷



北街藕池之西作大第昂新而居識者稱嘆不意筑甃者中興若此公事陳孺人至孝如實生已痛二親早逝不逮養凡有作為必謹必慎恐貽父母之辱自新先生嘉之為扁其堂曰務本名公多為賦詠公以族大而蕃譜久未續乃重修之時從父守正為兩浙都轉運副使公奉以求正且請曰此終為一家私書願得都司印記庶可傳遠運副公然之印而序之以歸性愛古法書名畫不惜百金購之曰此亦足養心性非他玩好可比與

人交率以誠慤人有善極口稱之有不善委曲開導貧不能存者假之財穀不計其能償與否見族子姪必獎勉誘掖俾進于善待僮僕未嘗疾聲厲色有慶弔必躬往不使兒輩鄉黨有急難盡力扶持有紛爭必為解釋晚歲氣益壯髮不白八十有四卒以正統甲子正月二日初配陳氏先公四十二年卒繼配東門汪氏先公六年卒子六人男二長瑜庶出次瑋汪出先公五年卒女四長贅朱章其三嫁汪武祥汪愷陳英仁孫男八昭旭

皞昌明昉曉晉以卒之明年十二月七日葬里仁東鄉  
周村先塋之次又明年其孫昭昌及公之甥汪英以元  
為公族姪請述其平生為狀將以乞銘于當世大人先  
生噫人生兩間有道德于躬足以顯揚有功烈于時足  
以惠利載之史冊傳諸不朽宜也然考之古史人有一  
行一善在所不遺豈非亦有繫于懲勸哉公以孤童子  
起家而能孝親睦族勤生務本周貧息爭慕善謹禮斯  
數者於今之士大夫亦或歎焉而公有之是可書也已

立言君子尚表章之

順天府照磨汪君有祥墓誌銘

張益

汪君有祥以順天府照磨疾卒于京其子璉琛侍官所得以躬湯藥含殮將扶柩歸葬衰經奉兵部郎中吳君永清狀泣拜請銘墓石君數從予往來有斯文好銘可辭乎君諱有祥字永華越國公之裔世居徽之休寧父士輝母夏氏自父而上比世皆隱德弗仕然能承守禮

法為望于鄉君幼穎敏早喪母事父與繼母黃克盡孝  
道友悌于兄武祥甫十歲讀書即通大義未冠屹如成  
人御史何公巡部見而竒之欲補邑庠生其父難之乃  
止君曰學豈為利祿哉貴在知義而適道耳學愈自力  
嘗遨遊江湖所主輒與賢士大夫交聞善言必服膺之  
觀善行則思欲與齊故其材器日就歸結書屋于東崖  
之傍將卒所業適有詔俾郡邑舉才德兼備之士知縣  
石首周君亟薦之君固辭不得則來京而鎮遠侯顧公

得以乞君于朝而教家塾君於訓誨有方師道尊嚴與  
公論議主賓意相洽公受命總神機營兵擇人贊畫戎  
務曰宜莫如吾家塾師也即以名聞君於是得官照磨  
從贊公事君效其勤能而又守之以廉日從營中回輒  
閉戶靜坐取經史以觀或吟詩或揮毫為草書情自適  
也衆方期其顯用而遽沒世莫不致深惜焉春秋四十  
有五君疾革時呼二子告之曰吾不求仕其俛而從仕  
者將在親逮祿養之為榮也今祿方得親幸康寧而吾

氣息奄奄若此分不起矣為謝吾親不得終盡子職天也奈何泣數行下遂瞑目而逝實正統乙丑六月二十有二日配葉氏有婦道子男二即璉琛也女二孫男一君氣清體癯而自腴于文藝秩雖未崇而歆焉弗勝者使假之年則其所至抑何止於斯哉是宜致所深惜於人也耶為之銘曰

車也可以任重何始輒而即止舟也可以利涉何始楫而遽已天實為之物胡能與吁嗟乎君兮尚德音之永

著

百歲程君寶墓表

家乘

貴三公富萬石文章功業名一時者人皆可致之惟壽則有不可強焉者况壽而至于百有餘歲者哉非上有建極錫福之君而斯人之得於天者獨厚且完烏足致此若吾宗以道君之壽豈直一家之盛哉固海內之所鮮也君與予同出梁將軍程忠壯公之後所居汧川其族以宋端明殿學士洺水先生孟顯曾祖煥祖連父安



皆力善不仕安娶于吳生君諱實字以道一諱詩其為人淳樸涉獵書史少容江湖間嘗以木易粟至姑蘇貸人值歲侵悉棄不取而歸歸更事畎畝不復出力勤孔時所入恒倍家居率晨起呼子弟督佃傭各職其職無侈以肆夜即課諸孫鳴琴讀書抵夜分乃寢客至張燕雄談雖老不倦既老取貲產立券不與子而與孫曰如此庶幾可均也君處已待人若易直然皆不失矩度一門百口馴馴怡怡號詩禮者或不能及君狀貌頎然兩

目如漆耳幾垂肩中有毫長二寸許齒髮變矣而白者  
黑脫者生年九十五歲以恩例授冠帶每鄉飲必禮為  
大賓君多辭不至年百有一歲乃終終時盛服呼諸孫  
語之曰我將與汝等永訣言訖而蛻君生無疾疾未嘗  
延醫請禱步履如飛終其身不杖殆異人也君生洪武  
乙亥閏九月十七日終於弘治乙卯三月十九日前後  
三娶初姚次黃次吳舉和順不盤族黨稱之子男三人  
德龍德思德良皆先君卒女三人皆有歸孫男九人孫

女三人曾孫男九人曾孫女六人玄孫男一人予又聞君壯歲在吳下遇雨渡而溺自念非除衣鞞無以獲生即伏水中褫衣去鞞一躍而起江行遇盜衆潛伏莫敢動君曰如此示弱舉將不免矣奮出直前搏之盜披靡散去然則君所稟之厚且完而加以伉健若此宜其壽之過人也因并書之貽其孫俾刻諸墓上之石嗚呼我列聖休養涵煦之澤被海內久矣而有人瑞焉乃出于新安之程氏得不謹著之以昭其盛於無窮也哉

處士李君有政墓表

錢溥

處士諱有政字士忠姓李氏其先唐宗室曰德鴻者德宗七世孫也居鄱之睦親院唐季避地新安居祁門夫溪之新田至昭三者又徙溪東五里許鄉人以其族鉅號李源昭三生全於處士為高祖曾祖武祖昌伯父宗厚永樂初為刑部主事父宗榮處士生即秀偉不凡喜問學以婺源朱子闕里多名師儒得游彥祥先生者授業焉彥祥語人曰此子雖幼言行正大他日必有過人

者處士學成不樂仕歸蒞家務以身先之正色法言內  
外斬斬且立規約俾男女各職其職率有賞悖有罰未  
幾產拓戶殷甲于一鄉然足跡不一至城市宣德末豐  
城孫曰讓主教祁門其弟太史曰恭以事過縣聞處士  
名力致之來與語連日夜恨相見之晚曰孔子謂施於  
有政是亦為政子真可謂顧名思義者矣處士性至孝  
宗榮君及生母方氏前後下世喪祭一以禮祖居險僻  
而高曾祖隴皆在梓木山乃卜地山麓構新第偕其兄

士智弟士成居焉久之兄不自安處士泣相諭且作券  
貽子孫共之無異議族黨間有不相能而譁者聞處士  
謦欬即止訟爭累年不決得處士一言無不退聽曰官  
府不及也景泰中歲祲有勸分之令處士曰噫朝廷以  
義倡民出粟賑饑而因之徽冠帶之榮是利之也何名  
為義哉於是大發廩助官而辭冠帶不受太守福山孫  
公甚重之里有虎石崩林深谷幽多猛虎時出傷人處  
士募人捕之幾盡又懸人於絕崖鑿其巖為砥道行者

無恐處士尤有識鑒內姪葉琦方童稚卽異之曰此子不凡助其學費而勗之成琦十八中南畿秋試第一人舉天順甲申進士休寧孫順早孤而危處士偶見之曰此福胚也不在其身必在其子贅于家順果有立而其子怡舉成化辛丑進士為刑部主事皆如其言縣令每舉鄉飲必禮為大賓晚自號務本鄉人皆以務本翁稱之年七十有七以成化七年辛卯十月丁亥卒其生洪武二十八年正月庚申娶葉有賢行琦之姑也子一曰

璨女一順之妻怡之母也孫三日濟汎溥處士墓在里  
長洲花郭園葬十年矣予觀漢世有鄉舉里選之法而  
唐宋以來亦置科以求懷抱材德之士非若近世之專  
務詞章法律而已考李處士之平生持家孝友居鄉信  
厚與夫識慮之明達設施之經遠使之稍見于世治一  
官效一事雖古所謂一鄉之善士豈多讓哉予故因怡  
之請為表其墓以為其鄉之勸

岐隱孫處士春股傳

家乘



處士諱春殷字士和姓孫氏世居休寧雷溪蓋唐金吾  
上將軍萬登之裔也曾祖良祖興父忠原皆以行義重  
其鄉忠原尤雋爽負材藝汭川程伯奇氏愛賢之館于  
貳室因家焉汭川之程則宋端明殿學士秘之族也處  
士為忠原第二子忠原既定居汭川餘子似續多寡弱  
獨處士有子八人有孫十有九人頽然壯齡角立參聳  
課耕貿易爭先亢宗而汭川之孫遂大以蕃忠原不偶  
于仕構一軒以泉石自名業未就緒也處士竭心力作

大第收腴田以奉親處兄弟燕賓友列庾貯粟闢塾訓子百用所需咸備無闕汧川之人咸嘖嘖嘆異曰克家之子如士和者非耶處士以其先在宋元有霽窓及艮山爽山芝田諸先生皆碩儒注意子弟俾嗣其業而弟春陽士輝質美嗜學一不以家務攷之士輝果以文學名一時蓋處士之所立如此處士初甚馴謹持已佻佻不自為表襮過客謙巽而內淵慤如閨閣處子既壯稍出其長以自見里有急為之解紛或弗率則喻之道義

皆服無退言雖大殖有家而憂人之憂扶孱拯困恒患不  
及又類古之賢豪者里東有岐山極幽勝處士晚築室山  
下號岐隱日坐其中讀易自適而以家事付諸子則又若  
幽人逸士與世相忘者處士以永樂丁亥二月八日生壽  
七十八而終八子者存仁存禮存智存信存英存心存讓  
存澤皆遵遺訓共矍不私蓄婚喪之費公衆給之男婦百  
口庭無間言

史官曰棠樾鮑先生言古之人有借隱以為高有終隱以

為潔若孫處士其知所隱而隱者耶昔者成周之盛鳳鳴於西岐今聖人在上至治邁古安知無鳳鳴於南岐耶吾見處士之子若孫必有文被五采出而大鳴於清朝者豈終隱而已耶鮑先生不妄人也其言固有徵於異日哉

清隱汪處士寧墓誌銘

魏驥

新安清隱汪處士既卒後十六年成化丙戌歲其子護等持其親程昇所為狀來予門泣且拜求銘以著壙中義不得辭因誌之處士諱寧字以清號清隱故新安舊族

系出唐越國公華越國有功於唐士人祠之其中葉頗以儒振世有聞人多顯仕者至宋竹山尹諱體仁七傳而至諱仲衡者嚴毅有才幹別號靜一鄉儒鮑謚齋為作記稱其能樂天命處士之父也有諱順德者處士之大父也諱彥暉者自邑西門移家紫雲溪居焉讀書明理學若風林朱學士趙東山先生皆與之往來風林題其齋曰養晦處士之曾大父也母吳氏生處士自幼穎敏異衆屹如成人既長益聰斷董持門戶賦斂得宜勤

先一邑綜理家務克盡其道比壯遊江湖薦紳多見器許家益饒裕勤儉如一既而告其父以所居讓伯父別創室以居後用父命復以新居讓諸弟再營室以處親在堂則備甘旨竭誠敬親有疾則不寢櫛躬湯藥親沒則極哀毀厚殯殮親遠則歲時潔菜盛豐祀事鄉閭式之里中有忿爭者必以理喻豪橫斂容怨者冰釋復能出其贏餘以周困乏母沒事繼母劉益恭謹又嘗集先世遺翰以貽子孫名傳芳錄鄉儒蘇公為之序書成而

處士不祿矣時景泰庚午九月十七日也處士生洪武己卯正月二十六日享年五十有二配謝氏子男四長即護次仁存瑞女四長適程慶祥次適程彥詵次適吳泰初季適程惟本孫男九護子三曰長宗巖宗賜宗仁子三曰德宗厚宗寶宗存子二曰衍宗勝宗端子一曰亢宗孫女八將以明年辛未十二月丙申厝岐山之陽遵治命也嗚呼人孰無死死而無聞者多矣處士仁聞一鄉富甲井里為善之力而子孫蕃衍且賢可謂無忝先

儒之胤者又能推讓其居以篤天倫孝友之愛使後人視效克念天顯之美又豈不由處士儀法始耶因為之

銘銘曰

惟先世之德臧俾爾子孫之昌矧躬行之德良宜爾名聞之章生而有益儀法於鄉沒而吾寧允矣揚其芳勒銘堅璞百世幽光

新安文獻志卷九十